

Rad Komisije još nije završen

U svom obraćanju danas tokom posjete lokaciji u Sandićima kraj Bratunca na kojoj se nalazi primarna masovna grobnica, gdje Federalna komisija za traženje nestalih vrši ekshumacije, visoki predstavnik Paddy Ashdown je rekao: "Užasna je pomisao na patnje onih koji su izgubili živote ovdje. Ništa ne može umanjiti ovaj gubitak i užas, no, ipak, konačno dolazi do promjene svijesti o učinjenom zlu. Ovo je prva ekshumacija u masovnoj grobnici koju su identificirali organi vlasti Republike Srpske."

Smatra se da se u ovoj masovnoj grobnici u Sandićima nalaze posmrtni ostaci oko 20 lica koja su ubijena u Srebrenici između 10. i 19. jula 1995. godine. Ovo je prva ekshumacija u masovnoj grobnici koja se vrši na osnovu informacija koje su organi vlasti Republike Srpske dostavili Komisiji za Srebrenicu tokom njene istrage. Ova lokacija je jedna od 32 koje su navedene u prvom dijelu Izvještaja koji je objavljen prošlog petka i jedna od 11 koje prethodno nisu bile poznate Federalnoj komisiji za traženje nestalih.

Naglašavajući da je Ministarstvo unutrašnjih poslova Republike Srpske tek danas dostavilo šesnaest kutija koje bi mogle sadržavati više informacija, visoki predstavnik je rekao: "Komisija za Srebrenicu nastavlja svoj rad i postoje mnoge informacije koje se moraju dostaviti dok Komisija ne završi svoj rad sredinom jula". Komisija za ljudska prava u sklopu Ustavnog suda BiH će sredinom jula pregledati Izvještaj i donijeti konačan sud o njemu. "Svaki pokušaj da se u ovoj zadnjoj fazi rada Komisije sakriju neke informacije podrazumijeva najteže posljedice", upozorio je visoki predstavnik.

"Samo uz potpuno otkrivanje informacija i odgovarajuće izvinjenje za ove događaje, te prihvatanje i utvrđivanje

individualne krivice, moguće je odstraniti osjećaj kolektivne odgovornosti koji opterećuje Republiku Srpsku,” rekao je visoki predstavnik.

Postoji šest sličnih odluka u vezi sa sudbinom žrtava u područjima koja uključuju Glamoč, Travnik, Foču i Višegrad, koje je donio Dom za ljudska prava BiH. Govoreći o budućnosti, visoki predstavnik je rekao: “Nadam se da iskustvo Komisije za Srebrenicu može ukazati na pravi put – ovo je model za budućnost. Ne možete graditi budućnost a da ne raščistite sa prošlošću.” Naglasio je da “ukoliko se Komisija za Srebrenicu pokaže uspješnom, što još uvijek nismo ostvarili, onda možemo graditi širi put ka pravdi i pomirenju”.

Vlada Republike Srpske je osnovala Komisiju u cilju provođenja odluke Doma za ljudska prava BiH od 7. marta 2003. godine, kojom se od organa vlasti u Republici Srpskoj zahtijeva da dostave sve informacije u vezi sa sudbinom i mjestima na kojima se nalaze lica nestala u Srebrenici između 10. i 19. jula 1995. godine.